

VENDIM
Nr. 59, datë 16.12.1997

Gjykata Kushtetuese e Republikës së Shqipërisë, e përbërë nga:

Rustem Gjata,	Kryetar i Gjykatës Kushtetuese	
Hilmi Dakli,	Anëtar	'''
Veil Budo,	Anëtar	'''
Zija Vuci,	Anëtar	i'''
Franc Jakova,	Anëtar	'''
Alfred Karamuço,	Anëtar	i'''
Kristofor Peçi,	Anëtar	i'''
Halil Kopani,	Anëtar	i'''

me sekretare Drita Filto, më datë 15, 17 dhe 18.11.1997, mori në shqyrtim në seancë gjyqësore me dyer të hapura çështjen nr.50 Akti,

K Ë R K U ESE: PARTIA DEMOKRATIKE, e përfaqësuar nga Z.Vladimir Mulaj, jurist.

SUBJEKTE TË INTERESUARA :

1. PARTIA SOCIALISTE, e përfaqësuar nga Z.Spartak Braho.
2. KOMISIONI QENDROR I ZGJEDHJEVE, i përfaqësuar nga Z.Kristaq Kume, kryetar.

O B J E K T I:

Shfuqizimi i vendimit datë 31. 8.1997 të Komisionit të Zgjedhjeve të zonës nr.4.

GJYKATA KUSHTETUESE, pasi dëgjoi përfaqësuesit e palës kërkuese dhe subjekteve të interesuara dhe bisedoi çështjen në tërësi,

VËREN:

Me vendimin nr.42, datë 22.8.1997 Gjykata Kushtetuese ka urdhëruar zhvillimin e zgjedhjeve të balotazhit në qendrat e votimit nr.10, 23, 27 dhe 28 të zonës së zgjedhjeve nr.4, në të cilat do të votohej për kandidatin e Partisë Demokratike Z.Ali Spahia dhe kandidatin e Partisë Socialiste Z.Lekë Çukaj. Në pjesën arsyetuese të këtij vendimi Gjykata i ka pranuar të mirëqena rezultatet e votimit në 54 qendrat e tjera të votimit të kësaj zone, duke u shprehur se Z.Lekë Çukaj ka marrë 187 vota më tepër se Z.Ali Spahia (të dokumentuara në pasqyrën datë 15.8.1997 që Komisioni Qendror i Zgjedhjeve ka dorëzuar në Gjykatë).

Gjatë shqyrtimit të çështjes objekt gjykimi është vërtetuar se në datë 31.8.1997 zgjedhjet e balotazhit janë zhvilluar vetëm në qendrat e votimit nr.10 dhe 28, ndërsa nuk janë zhvilluar fare në qendrat e votimit nr.23 dhe 27, për shkak të mosmarrjes së masave organizative dhe kundërshtive që kanë patur në komisionet e zgjedhjeve anëtarët e të dy palëve.

Sipas procesverbaleve të qendrave të votimit nr.10 dhe 28, rezulton se më datë 31.8.1997 në këto dy qendra votimi kanë votuar për Z.Lekë Çukaj 302 zgjedhës dhe për Z.Ali Spahia 112 zgjedhës. Duke i mbledhur këto rezultate me 5099 votat që kishte më parë Z.Lekë Çukaj dhe 4912 votat që kishte Z.Ali Spahia, rezulton se në 56 qendrat e votimit ku janë zhvilluar zgjedhjet (nga 58 qendra votimi që kishte zona e zgjedhjeve nr.4), Z.Lekë Çukaj ka marrë 5401 vota, ndërsa Z.Ali Spahia ka marrë 5024 vota, pra diferenca ndërmjet tyre është 377 vota në favor të Z.Lekë Çukaj.

Meqënëse në qendrat e votimit nr.23 dhe 27 ku nuk janë zhvilluar zgjedhjet numuri i zgjedhësve të regjistruar në listat e zgjedhjeve është 310 zgjedhës, pra më i vogël se diferenca prej 377 votash në favor të Z.Lekë Çukaj në 56 qendrat e votimit ku janë zhvilluar zgjedhjet, Gjykata çmon se kërkesa e palës kërkuese për zhvillimin e zgjedhjeve edhe në qendrat e votimit nr.23 dhe 27 duhet refuzuar, sepse çdo rezultat i mundshëm në këto dy qendra votimi nuk ndikon në rezultatin përfundimtar.

PËR KËTO ARSYE,

Gjykata Kushtetuese e Republikës së Shqipërisë, në mbështetje të nenit 24, pika 7 të ligjit

nr.7561, datë 29.4.1992 "Për disa ndryshime e plotësime në ligjin nr.7491, datë 29. 4.1991 "Për dispozitat kryesore kushtetuese" si dhe nenit 50 të ligjit nr.7556, datë 4.2.1992 "Për zgjedhjet e Kuvendit Popullor të Republikës së Shqipërisë", me shumicë votash,

VENDOSI:

Prëzimin e kërkesës.

Ky vendim është përfundimtar, i formës së prerë dhe hyn në fuqi menjëherë.

MENDIMI I P AKICËS

Nuk pajtohem me mendimin e shumicës për shkak se :

Nga shqyrtimi gjyqësor i çështjes u provua se në qendrat e votimit nr.23 dhe 27 të zonës nr.4 të zgjedhjeve, nuk është zhvilluar asnjëherë votimi për deputet në Kuvendin Popullor, qoftë në raundin e parë qoftë në raundin e dytë të zgjedhjeve, për shkak se nga organet kompetente shtetërore nuk janë hapur asnjëherë këto qendra për votim.

Gjykata Kushtetuese me vendimin nr.42, datë 22.8.1997, ka urdhëruar zhvillimin e zgjedhjeve të raundit të dytë edhe në këto dy qendra votimi, të cilat përsëri nuk janë hapur më datën 31. 8.1997, kur do të zhvillohej raundi i dytë i zgjedhjeve..'

Mosparaqitja e komisionit të qendrës së votimit për hapjen e saj dhe mosdeklarimi i fillimit të votimit në qendrën e votimit në orën dhe datën e caktuar nga kryetari i komisionit të qendrës, përbën shkelje të rënda dhe vjen në kundërshtim me nenin 64 të ligjit "Për zgjedhjet e Kuvendit Popullor të Republikës së Shqipërisë".

Nga ana tjetër kjo gjithashtu përben cenim të lirisë së individit për të shfaqur vullnetin e tij politik me anë të votës dhe të së drejtës themelore kushtetuese të parashikuar nga neni 19 i ligjit Kushtetues "Të drejtat dhe liritë themelore të njeriut", që gëzon shtetasi madhor për të votuar për njërin nga kandidatët për deputet të paraqitur në zonën e zgjedhjeve dhe vetëm për njërin nga subjektet elektorale që marrin pjesë në shpërndarjen e mandateve shtesë në shkallë vendi.

Për shkaqet e lartpërmendura vendimi i komisionit të zgjedhjeve të zonës nr.4 që ka shpallur fitues kandidatin e Partisë Socialiste, është i pasaktë dhe si i tillë duhet të shfuqizohet dhe njëkohësisht të zhvillohen rregullisht zgjedhjet në qendrat e votimit nr. 23 dhe 27 dhe, pasi të nxirret rezultati përfundimtar dhe i plotë i votimit, të shpallet kandidati fitues. Vetëm kështu do të gjente zbatim ligji kushtetues dhe ai për zgjedhjet e deputeteve të Kuvendit Popullor si dhe vendimi i Gjykatës Kushtetuese të lartpërmendur, në bazë të të cilit është urdhëruar zhvillimi i zgjedhjeve edhe në qendrat e votimit nr.23 dhe 27. Vetëm pas zhvillimit të zgjedhjeve në të gjitha qendrat e votimit të zonës, mund të bëhet vlerësim i drejtë dhe i plotë dhe të nxirret rezultati i saktë e përfundimtar.

ANËTAR
H. Kopani

KRYETAR
R. Gjata

Tiranë, më datë 16.12.1997